

batteaux, & du bagage qui fut mis à l'eau, ny de l'embarquement de cinquante trois personnes. Le sommeil, dans lequel ils estoient profondement enseuelis, après auoir bien chanté, & bien dansé, leur déroba cette connoissance; mais enfin la nuit ayant fait place au iour, les tenebres à la lumiere, & le sommeil au réueil, ces Barbares sortirent de leurs cabanes, & se pourmenant à l'entour de nostre maison bien fermée à clef, s'estonnoient du grand silence des François. Ils ne voioient sortir personne pour aller au trauail, ils n'entendoient aucune voix. Ils creurent au commencement qu'ils estoient tous en prieres, ou en conseil; mais le iour s'auançant, & ces prieres ne finissant point, ils frapperent à la porte. Les chiens, que nos François auoient laissez à dessein, leur répondent en iappant. Le chant du coq qu'ils auoient entendu le matin, & le bruit de ces chiens, leur fit penser que les maistres de ces animaux n'estoient pas loin, ils rentrent dans la patience qui leur échappoit; mais enfin le Soleil commençant à descendre, &